

ըութիւններին, հասարակական կազմակերպութիւններին ու մասնաւոր անհատներին թողնուած էր իրաւունք բանալու և պահելու որբանոցներ, միայն պետութեան հսկողութեան տակ:

Դարձեալ հոկտ. 11-ին յատկացեց 12,736,250ր. որբերի, անճար և աննեցուկ դաղթականների օգնութեան և դաղթականներին տրամադրելիք բնակարանների վերաշինութեան համար:

Խորհուրդը արձակեց նաև մի շարք վճիռներ աշխատաւորութեան ու պաշտօնէութեան, հաշմանդամների և պետական ու հասարակական պարտականութիւններ կատարելիս մեռածների վիճակը բարելաւող, հարկային ու պարենաւորման դրութիւնը կարգաւորող: Վարկեր յատկացեցին միեւրթների դնման, ոստիկանութեան ու նոր զօրամասերի կազմակերպման, քաղաքային ինքնավարութիւնների ու կօօպերատիւների օգնութեան և համանման ուրիշ կարիքների համար:

Պէտք է նկատել, որ Հայ. Խորհրդի աշխատանքը ամբողջապէս ուղղւած էր երկրի ընթացիկ սուր կարիքների մեղմացմանը: Հիմնական շինարարութեան մասին, ի հարկէ, խօսք լինել չէր կարող: Նոյնը և կառավարութեան գործունէութեան մէջ. նա գերազույն ձիգ էր թափում, գլխաւորապէս, օրւայ հրամայական պահանջներին բաւարարելու համար. հաց, դեղ և անդորրութիւն — այս երեք խնդիրներով կարելի էր սպառել այն ժամանակւայ «պետական շինարարութիւնը»:

Իր խղճուկ միջոցներից Հայաստանը ստիպւած էր բաժին հանել և երկրից դուրս գտնւող կարօտեալներին: Հոկտ. 26-ին, Հայ. Խորհուրդը կէս միլիոն ըուրլի յատկացրեց Բաղուի հայ աղէտեալներին, նոյ. 4-ին 5 միլիոն ըուրլի քէշարկեց՝ Վրաստանի Հայոց Աղգային Խորհրդին միանալով նպաստ տալու համար, դեկտ. 3-ին 300,000ր. վարկ բաց արււ Պարսկաստանի հայ փախստականների օգնութեան և այլն: Փշրանքներ էին սրանք տիրող ծով կարիքի համեմատութեամբ, բայց Հայաստանի սեղանի վրա էլ փշրանքից զատ բան չկար, հայ ժողովուրդը չունեցածից էր տալիս:

*

Հոկտ. 5-ին Խալիլ փաշան Երևանում յայտնեց, որ ինքը հրաման է ստացել դատարկելու Լոռի-Փամբակի շրջանը: Անմիջապէս հայ և թիւրք հրամանատարութիւնները դժեցին այդ շրջանը հայերին փոխանցելու ծրագիրը, և Հայաստանի կառավարութիւնը հրամայեց Դիլիջան-Լոռիի զօրամասի պետ Դրօին՝ բռնել հեռացող թիւրք զօրքերի տեղը:

Դիլիջան-Լոռիի զօրամասը, այդ միջոցին, բաղկացած էր հետեւեալ ուժերից. պարտիզանական հետեակ զունդ՝ գնդ. Միրիմանեանի հրամանատարութեան տակ, պարտիզանական ձիաւոր զունդ՝ հրամանատար գնդ. Կօրոկլով, 4րդ լեռնային մարտկոցը (4 թնդանօթ) և նոր կազմւող Ղազարի միլիցիոն զունդը՝ սպայ Թ. Մնացականեանի գլխաւորութեամբ: Դրօն զօրամասի հրամանատար էր նշանակւած օգոստոսին: Քաղաքացիական մասի օգնականն էր Ս. Մանասեանը: